

小倉山房文集

小倉山房文集卷十八

錢唐袁枚子才

答程魚門書

僕無秋不病七月間又沾作而伏矣小愈輒復瘠若槁
木之枝書來道稚威定字化爲異物病中聞此悲何可
支惠子湛深經術僕愛而未見稚威則少相狎長相敬
也懷奇負氣賁志以沒所著繁富聞其兒子以爲不祥
都拉雜摧燒之其人舉於鄉識道理或不宜有此魏文
帝云旣傷逝者行自念也陸雲與楊彥明書云昔年少
時見五十公去此甚遠今日冉冉已覺近之思二公言
益人悽愴記前年與足下約毋刊所作詩文比來思之

此語終竟未是豈不知學與年兼深造可喜古人文字
無自爲開雕者然彼此一時正難泥論求心苟足待後
無期孔子稱七十從心哲人竟斐倘再登大耋必不以
七十自足也學者如牛毛傳者如麟角先爲之傳以待
後人可也若四十未足曰待五十五又未足曰待六
十云云不已溘然早至有子如彼無子可知其卒誰能
紀傳之耶道家以形骸爲宅舍神明爲真吾文章者吾
之神明也可不存哉曹子建云文之佳惡吾自知之少
陵亦有得失寸心之言先哲餘論當不我欺僕詩兼衆
體而下筆標新似可代雄文章幼饒奇氣喜於論議金
石序事徽徽可誦古人吾不知視 本朝三家非但不

愧之而已足下詩才幾抗絳雲文太紆餘仲宣同累然
南雷下可雁行矣他學淹貫過僕遠甚顧足下著一書
垂之不朽正是成其所長非因足下勸我止其觴而還
酢之也介眉侍講來此執後進甚恭八十頑翁得此於
天蓋寡綿莊衰甚烟視媚行非復如前所見今且卧病
精神欲辭之而去海內儒者又弱一个焉人何以堪僕
與足下離七百里一晤輒三四年彼此髮有二色矣才
難之嘆知音之孤中夜彈指幾人尚在私心拳拳覺骨
肉妻孥不如文字之交關愛較重近舉一男寤生氣絕
區區者而不予昇天道可知然使有一卷書傳後則幽
冥魂魄長逝無憾功勲子嗣都無所關此語要惟足下

信耳西風滿天伏惟珍重不備

與某刺史書

寄示詩四卷俱衰經中哭中丞公之作具見純孝發于心聲然區區之見有不敢不自白之左右者禮大功廢業又曰嬰兒哭其母何常聲之有足下斬衰之喪非止大功有韻之詩非止常聲以禮律之似足下在服中不得爲詩縱爲詩不得哭父古惟傳戚孫綽有服中哭母詩是時東晉清談禮教陵遲不可爲訓自唐以來詩人林立孝子亦林立未聞有以哭二親爲題者蓋至親無文詩固言之文者也不文不可以爲詩文則不可以爲子兩者相背而馳故從來畫家無畫天者輓詩無輓父者劉畫作六合賦昔人以爲大愚若以罔極之恩而鋪陳

之。于。聲。調。之。末。是。卽。盡。天。賦。六。合。之。類。也。子。夏。免。喪。彈
琴。而。不。成。聲。足。下。未。免。喪。握。筆。而。已。成。韵。異。乎。僕。所。聞。
僕。方。慮。足。下。性。耽。吟。咏。或。三。年。中。不。能。忘。此。結。習。偶。有。
所。作。亦。必。假。其。年。月。于。服。前。服。後。以。免。于。君。子。之。譏。而。
不。意。足。下。之。卽。以。禮。所。禁。者。而。自。暴。章。之。也。韓。昌。黎。于。
十。二。郎。從。子。也。其。祭。文。獨。不。用。韵。蓋。雖。期。功。之。喪。亦。有。
不。忍。文。之。之。意。馮。足。下。孺。慕。不。已。故。長。言。之。長。言。不。已。
故。咏。嘆。之。原。非。以。此。爲。名。也。然。果。合。乎。禮。以。得。名。尚。非。
孝。子。之。心。所。願。乃。背。乎。禮。以。累。名。又。豈。孝。子。之。心。所。安。
公。羊。曰。仁。不。勝。道。記。曰。詩。之。失。愚。此。之。謂。矣。足。下。盡。取。
服。中。所。作。哭。而。焚。之。中。丞。公。有。知。必。以。愚。言。爲。是。諛。足。

下者豈不曰三百篇中亦有陟岵蓼莪諸作不知陟岵者孝子行役之詩其親存也蓼莪者刺幽王之詩毛傳可考也

答門生王禮圻問作令書

書來問作令之道甚勤且摯僕老矣隱空山十年向所
行爲不復省記然涎瀕病馬久不知鞍轡爲何物或放
而前之俾引其生平經歷之處則雖龍駒乘黃求之或
先也夫吏治有不可學者有可學者天之生才敏鈍各
異或應機立決或再三思而後決或卧而理或戴星出
入而後理此豈可學哉然行政之方與安吏民之道則
循吏不同同歸於治今以縣令所當知與僕行之而有
效且與才性無關者爲足下告焉夫治民者州縣之職
也然治民不自民始胥吏者官民交接之樞紐也家丁
戚友又胥吏交接之樞紐也不治胥吏不能治民不治

家丁戚友不能治胥吏治家丁戚友胥吏奈何曰用之而勿爲所用是已其用之而勿爲所用奈何曰通之而勿隔是已官與吏終日見而無勞家人之轉通官與民又終日見而不許胥吏之壅遏則彼胥吏家丁戚友者不過供奔走佐使之職而已矣而何弊之能爲且夫用戚友不如用家丁用家丁不如用胥吏用胥吏不如用百姓戚友果賢何所不可如其不肖法難遽加若家丁則利在前法在後矣然家丁之來去無常胥吏之曹缺永在其畏法媚官甚於家丁較可用也胥吏之職大都拘人集衆若受訟時朱書牒尾卽令某甲喚某乙寧不省需索而免稽遲乎是百姓尤可用也吾不解今之爲

政者一則曰嚴胥吏再則曰嚴胥吏夫胥吏卽百姓也非鬼蜮禽獸也使果皆鬼蜮禽獸宜早誅之絕之而又何必用之而嚴之周官所謂陳其殷置其輔輔卽胥吏也雖聖人不能不用也然三代上有庶人在官之祿今旣無之則上之人宜爲若作設身想而何嚴之爲彼嚴者豈不曰胥吏舞文乎病百姓乎夫使之舞文病百姓者官也非胥吏也試問已舞之文判行者誰耶加印者誰耶彼舞而我亦隨而舞之不自責而責人何也胥之權在行檄役之權在奉檄今之縣令檄行若干不知檄書云何不知某當理不知某當銷又不知如是而欲除弊雖日殺百胥吏無益也夫欲大權在我莫如手記而

手銷之以州縣之繁而謂事必親記似屬奢濶之論不知訟牒極多每日所進能過百紙乎百紙中其理者能過十事乎每日記十事未爲難也次日再收百紙大半覆詞訴詞其應記者又減十而得五矣受牒十日書所記而召之訊訊吏何以不行檄則吏窮訊役何以不集犯則役窮窮則免冠謝罪請嗣後十日內行檄集犯永爲例矣檄行犯集隨判而隨銷之任行役之需索奸匪之侮張而不出十日之期則所費有限枝節不多其初情未改訊斷亦易彼百姓者知十日之必結也又何畏乎吏役而賄之法立半年可十日中竟無一事此胥役之所大懼也然民不告賊上不訪吏有提吾胥吏者官

自當之不許胥吏索百姓之錢亦不許上官胥吏索吾
胥吏之錢彼胥吏者不懼于始而感于終乎康誥曰要
囚服念五六日至于旬時非速結之義乎夫可以探喜
怒轉關鍵者胥稟也有減增有株引者檄稿也有移換
有竄入者供詞也有暗阻有明催忽早忽遲者訊期也
吾一切月覽而親裁之許一檄不許重檄檄中人數空
之而待親裁差某役亦空之而待親裁內銷外結檄焚
卷撤彼胥吏何權焉于胥吏又何誅焉今之州縣非不
勤也所惜者精神在上而不在下耳不知上行不答則
嚴飭至內幕外胥俱能相促惟夫寡妻弱子鄉民村戶
不遠百里而來榮汝之糧望官如望歲而又無門探刺

不爲之結于挾日以內吾心安乎政綱既舉首清刑罰
清之云者非寬減之謂得當之謂也臯陶曰罪疑惟輕
言罪之疑者輕之其不疑者不輕也孟子曰省刑罰言
省察之不使刑罰繁也蓋刑以戒惡也刑繁則不足以
懲惡而轉生刑之惡以爲吾旣已受刑而無所損矣尚
何懼哉以此牛疥病而逞毒淫者比比焉要知刑具而
部頒之亦無庸也夫物之不齊物之情也彼衣冠孱民
加細荆而呼號不勝何事于部頒之具積蠹大猾其筋
骨皆習練之餘當巨梃而含笑囊三木而無聲何畏乎
部頒之具吾以爲其畏刑者雖應答亦宜寬省以洒其
恥其玩刑者法止杖四十而吾以二十當之其酷則更

甚于四十使彼知二十之委頓如此也况四十耶乃凜凜乎懼心生而惡念除矣凡判尾必親書讞非炫才也以便日後展卷而了然也判事必坐堂皇非矜衆也以觀國人之顏色而是非使共見也勿輕置人于獄非徒仁也所以清狴犴而防襍處之不虞也勿輕申詳非專擅也所以免捉搦而成難結之案也勿問坐獄者之貧富恐有成見而悞大公也勿故反聽請者之詞求恐事未可知而矯枉過正也勿勸捐以安富恐抑勒者多勿罰鍰以遠嫌恐徇財者惑勿交鎖練于胥役必內存之當用者加朱墨圍使不得開不當用者不署鎖字使不得混勿委監獄于典史必驟臨之審其輕重辨木索之

有無觀其氣色知衣糧之尅扣孔子曰聽訟吾猶人也
必也使無訟乎此聖人甚言無訟之難非言聽訟之易
也今之人不能聽訟先求無訟不過嚴狀式誅訟師訴
之而不知號之而不理曰吾以息訟云爾此如防川怨
氣不伸訟必愈多不知使無訟之道卽在聽訟之中當
機立決大畏民志民何訟耶所謂側弁垢顏不投于明
鏡是也然而一閱之獄情偽萬出或在案中或在案外
聽之者恃才恃氣恃廉恃公皆不足以聽也虛以受之
靈以應之周詳以求之旁見側出以察之庶足以聽也
大凡事過而嘗自悔其誤者其誤常少此所謂政如農
功日夜思之者也事過而常自信無一事之誤者其誤

必多此所謂氣矜之隆。秦人視越人之肥瘠者也。對簿之民宜分爲六重者。獄其次繫其次管守其次保釋其次待喚其次聽其所之數者。能臨事料量而不容胥吏持之則聽訟之道思過半矣。和息非不可允但須書明曲直以防日後之終凶狎邪非不當嚴但須戚屬投明不許匪人之恫喝律設大法而通融者存乎人否則傀儡而已案無確據而闕疑者法乎史否則武斷而已觀漢江充之巫蠱而知賊之可裁也。觀南史傅琰之斷獄而知凶器之難據也。天性之親絜而不殊雖父訴子亦使自筭否則傷慈愛矣。墳田之事勘而後斷雖風霜寒暑不可辭勞且借以巡鄉村矣。刑名之外則有錢穀錢

穀役侵者多民負者少比役無益也役又借比以索民
錢善催科者不輕比役但擇其負多者召花戶而欲見
之吾未見真花戶來而稅不登者也慮飛洒則細刊科
則昭示鄉氓防重耗則笑取衡平率較一二漕無抑勒
則浮取皆恩糶果應時則盈虛有備所謂催科中寓撫
字也百姓之上尚有紳士凡今之閉門塞竇而不見客
者其中有所不足也古人于一邑中有鄉先生鄉大夫
歲時伏臘飲酒習射當其時豈有苞苴竿牘之嫌乎作
吏者日對里魁伍伯而不親賢士大夫不特天闕下情
亦自覺其不雅記有之曰貴貴爲其近于君也尊縉紳
卽所以尊朝廷其他生童皆吾子弟亦宜月課季試以

無失黨庠術序之義。漢吳公治行號第一。而史只載其薦賈生一事。此其故可思也。總而論之。爲政在心。心正則羣邪消。心和則衆善集。心周於庶務。而法令不必苛煩也。心淡于榮祿。而上官無所挾持也。大府一過而廉從之。誅求無厭。知我之巡鄉。亦猶是也。崇轅一入而守候之。飢渴無時。知民之望我。不甚殊也。威可使人畏。不可使人恨。恩可使人感。不可使人狎。廉不自知者。廉之真。公不自恃者。公之大。民信則順風而呼。吏服則指臂可用。告示爲吾之仁。言不必輕發而發必手書。訪聞非政之大體。行或偶然而行。必真確求心安。不求名重。察物議並察邇言。仁無術而不行政。師古。

而毋泥吾之所行者。在是矣。吾之所能言者。亦止於是矣。若夫神而明之。化而裁之。則在吾子矣。

答惠定宇書

來書懇懇以窮經爲勗。慮僕好文章。舍本而逐末者。然
比來見足下窮經太專。正思有所獻替而教言忽。來則
是天使兩人切磋之意。率有明也。夫德行本也。文章末
也。六經者亦聖人之文章耳。其本不在是也。古之聖人
德在心。功業在世。顧肯爲文章以自表著耶。孔子道不
行。方雜言詩書禮以立教。而其時無六經名。後世不得
見聖人。然後拾其遺文。墜典強而名之曰經。增其數曰
六曰九。要皆後人之爲。非聖人意也。是故眞僞雜出而
醇駁互見也。夫尊聖人安得不尊六經。然尊之者。又非
其本意也。震其名而張之。如托足權門者。以爲不居至

高。之。地。不。足。以。踳。躐。他。人。之。門。戶。此。近。日。窮。經。者。之。病。
蒙。竊。恥。之。古。之。文。人。孰。非。根。抵。六。經。者。要。在。明。其。大。義。
而。不。以。瑣。屑。爲。功。卽。如。說。關。雎。鄙。意。以。爲。主。孔。子。哀。樂。
之。旨。足。矣。而。說。經。者。必。爭。爲。后。妃。作。宮。人。作。畢。公。作。刺。
康。王。所。作。說。明。堂。鄙。意。以。爲。主。孟。子。王。者。之。堂。足。矣。而。
說。經。者。必。爭。爲。卽。清。廟。卽。靈。臺。必。九。室。必。四。空。必。清。陽。
而。玉。葉。問。其。由。來。誰。是。乘。關。雎。之。筆。而。執。明。堂。之。斤。者。
乎。其。他。說。經。大。率。類。此。最。甚。者。秦。近。君。說。堯。典。二。字。至。
三。萬。餘。言。徐。遵。明。悞。康。成。八。寸。策。爲。八。十。宗。曲。說。不。已。
一。閔。之。市。是。非。麻。起。煩。稱。博。引。自。賢。自。信。而。卒。之。古。人。
終。不。復。生。乎。彼。乎。乎。此。乎。如。尋。鬼。神。搏。虛。而。已。僕。方。怪。

天生此迂繆之才。後先噂噉。擾擾何休。敢再拾其藩。而以吾附益之乎。聞足下與吳門諸士。厭宋儒空虛。故倡漢學。以矯之意。良是也。第不知宋學有弊。漢學更有弊。宋偏于形而上者。故心性之說。近元虛。漢偏于形而下者。故箋註之說。多附會。雖捨器不足以明道。易不盡詩。不歌無悟入處。而畢竟樂師辨乎聲。詩則北面而絃矣。商祝辨乎喪禮。則後主人而立矣。藝成者貴乎德成者貴乎。而况其援引妖讖。臆造典故。張其私說。顯悖聖人箋註中。尤難僕指宋儒廓清之功。安可誣也。僕亂齒未落。卽受諸經。買孔註疏。亦俱涉獵。所以不敢如足下之念茲在茲者。以爲六經之于文章。如山之昆崙。崙河之星。

宿也。善遊者必因其胚胎濫觴之所以周巡夫五嶽之
崔巍江海之交滙而后足以盡山水之奇若矜矜然孤
居獨處于崑崙星宿間而自以爲至足則亦未免爲塞
外之鄉人而已矣。試問今之世周孔復生其將抱六經
而自足乎抑不能不將漢後二千年來之前言往行而
多聞多見之乎夫人各有能不能而性亦有近有不近
孔子不強顏閔以文學而足下乃強僕以說經倘僕不
能知己知彼而亦爲以有易無之請君子其能舍所學
而相從否

答定宇第二書

覆書道士之制行非經不可疑經者非聖無法云云僕更不謂然夫窮經而不知經之所由名者非能窮經者也三代上無經字漢武帝與東方朔引論語稱傳不稱經成帝與翟方進引孝經稱傳不稱經六經之名始於莊周經解之名始於戴聖莊周吳端也戴聖賊更也其命名未可爲據矣桓靈刊石經匡張孔馬以經顯歐陽歙賊私百萬馬融附姦周澤彈婁陰鳳質人衣物熊安稱觸觸生經之效何如哉六經中惟論語周易可信其他經多可疑疑非聖人所禁也孔子稱多聞闕疑又稱疑思問僕旣無可問之人故宜長闕之而已且僕之疑

經非私心疑之也。卽以經證經而疑之也。其疑乎經所
以信乎聖也。六經者文章之祖。猶人家之有高曾也。高
曾之言。子孫自宜聽受。然未必其言之皆當也。六經之
言。學者自宜參究。亦未必其言之皆醇也。疑經而以爲
非聖者。無法然則疑高曾之言而爲之幹蠱爲之幾諫
者。亦可謂非孝者無親乎。漢王充曰。著作者爲文。儒傳
經者爲世。儒著作者以業自顯。傳經者因人以顯。是文
儒爲優。宋劉彥和曰。傳聖道者莫如經。然鄭馬諸儒宏
之已足。就有闕宜。無足行遠。唐柳冕曰。明六經之義。合
先王之道。君子之備也。明六經之註。與六經之疏。小人
之儒也。今先小人之儒。而後君子之儒。以之求才。不亦

難乎此三君子之言僕更爲足下誦之足下謂說經貴
心得不以沿襲爲工此言是矣然而一人之心卽衆人
之心也一人之心所能得卽衆人之心所能得不足以
爲異也文章家所以少沿襲者各序其事各值其景如
烟雲草木隨化工爲運轉故日出而不窮若執一經而
說之如射舊鵠雖后羿操弓必中故所受穿之處如走
狹徑雖踈踈小步必履人之舊迹也前賜讀大禮議六
宗說俱精確然一則毛西河曾言之一則郝京山曾言
之其書俱在其說更詳此豈足下有意襲之哉足下之
心得之彼二人之心先得之足下之識雖在二人之前
而足下之生已在二人之後則不襲之襲二人傳而足

下。不。傳。矣。且。僕。固。疎。於。經。者。也。甫。得。二。義。已。覺。其。襲。倘。
從。足。下。之。言。而。惟。經。之。是。窮。則。足。下。之。終。日。仰。首。屋。梁。
所。自。矜。獨。得。者。不。俱。可。危。乎。要。之。足。下。自。問。不。能。購。盡。
天。下。說。經。之。書。又。不。能。禁。絕。天。下。說。經。者。之。口。姑。毋。以。
說。經。自。喜。也。

答滋圃中丞論推命書

公以撫軍之尊而手書勤勤求馬叟推命僕心大不喜夫命孔子之所不知也馬叟何人其聖乎孔子乎而能知也子曰不知命無以爲君子知卽知其不可知者而已知其不可知故其所可知者不惑也堯之時皐夔隆貴人不言其命達共驩流放人不言其命窮及西伯戡黎紂無以自解乃嘆曰我生不有命在天非唐虞時無命桀紂時有命也理不足而后求諸數也公生堯舜之世身爲皐夔理宜顯貴理宜平善何嫌何疑而欲數之求古之神乎命者首稱唐李虛中然虛中餌金丹疽發背亡其子知命果何如也世之人村氓里媼危屯已極

偶一啼求之與異日亨嘉當亦人情所應有乃往往貧賤之人轉不爲此而愈顯貴者則愈爲之并愈信羣禁宅忌之說此無他射黃金注者外重則內惑故也然藉此爲趨避計則方寸中乍水乍火何以稱職任事勤施於四方耶且彼言吉歟公如命何彼言凶歟公如命何倘吉可趨凶可避是無命也不必知也吉不可趨凶不可避是有命也知如不知也福善禍淫者天也求之于命是無天也嘗善罰惡者君也求之于命是無君也古大撓定支干毫無義意猶之一二三四紀數名云爾一二三四無可推則甲乙子丑亦無可推費補之言一時生一人一日夜生十二人以卒歲計之只四千三百二

十人以一甲子計之只二十五萬九千二百人今一鄉
中戶口不下數百萬則年月日時同者多矣又何貧富
貴賤之紛紛乎文文山贈朱斗南序朱景濂祿命論亦
稱命只五十一萬八千而四柱盡矣餘皆雷同古所稱
知命者邾文公楚昭王皆以不知知之天道遠人道邇
捨人而言天大半恍惚凡一切時日小數陰陽襍家愈
神奇則愈受禍史冊中如郭璞郭鑒輩何可勝數然天
下無業之氓太多不得已托九流襍技以謀其生當亦
先王所不禁仁人君子妄言妄聽優俳畜之亦無所爲
非若竟倚奉如神而且有抑抑求教之意則此輩無識
或借此喝鄉閭誣謗公事醜然與士大夫抗禮是則王

制所謂假鬼神時日以惑衆者殺可也易稱樂天知命
子思稱居易以俟命孟子稱修身以立命陸贄稱君相
造命孔子則罕言命公之命亦知之俟之立之造之罕
言之而已何必推

答某明府書

書來愠僕不序足下之詩過矣僕豈特不爲足下作序并不願足下作詩詩之道主溫柔足下作令能柔其民卽詩人矣不必于政外求詩若就足下之詩論之尚非索序時也以足下才敏不傲然行世而必僕序之求意中似有僕者然則僕不序足下足下必湛思而自省曰是區區者而不余畀何耶不求之于僕必求之于詩詩將日進僕序足下足下覽鏡自臧從此不求之于詩并不求之于僕而詩將日退愛足下者不當如是若夫隱約其詞陽許而陰非之又非朋友直諒之道也且足下亦知序所由昉乎爾雅序疏云序者序陳此經之旨也

杜牧答莊充亦云凡夫序者皆其人已亡門生故吏尊師其人而序之非生同時者也僕與足下同時生足下未亡僕又無所尊師僕縱欲序足下足下尚宜拒而辭之何反以不得爲慍耶大抵古人多自序求人序以重其文者自皇甫之序左思始至李漢序韓則又序人文以自重矣足下之詩自作之自序之誰曰不宜若果能重僕僕將求序足下不待足下求僕若云倚僕爲重則僕位庠望狹何足以重足下而當代之爲皇甫者哉冠林立足下解慍處甚多其速往可也勿疑

寄蔣哲生書

書來示樂府四章當卽手絃而口歌之緣西行人稀缺然未報書中有奉太夫人之長安將泊石城之語小人洒漑做虛瞻望弗及何子之忘之也比來聞足下成進士入翰林如獲殊慶大祥不覺娵娵然距躍三百伏念天之生才與國家之設官義本相因而起而往往才自才官自官此無可如何之勢也然僕謂自斗食以上至于卿貳皆可假借惟翰林一官必待其人而后居之何也簿書期會因事見才期於適用故流品不嫌其雜若清秘之職爲天子潤色雅頌裁制謨誥非學古入官者不宜一朝居且居是官者必已能爲文章然後克稱

非如膠庠子弟博習親師尚可期以三年五年也僕壬申歲過揚州愛足下僧壁詩思其人苦不得見幸熊安亭爲道區區夫崇鼎大璜夏后氏之龍簋僕亦未之見也然聞其尚存則喜聞存某所更喜聞其登明堂而陳清廟尤大喜喜之情公也以爲惟我能先識則亦未嘗不出于私足下之入詞林也才與官合僕之喜也私與公俱故因泰樹舍人來而通書以賀

小倉山房文集卷十九

錢唐袁枚子才

慰王麓園喪子書

足下母以喪子爲戚按洪範九疇道五福六極甚詳無
道子嗣者孔子衰年喪鯉哀遜顏淵儀禮傳曰大宗不
可絕公羊傳註曰小宗無後當絕喪大記曰喪有無後
無無主夫當絕與無後古人明言之而不諱是有子與
無子非聖賢意也說者動以無後爲不孝云云不知孝
者人所爲有後無後者天所爲待天而後成孝非教也
商臣盜跖皆有後者也得謂之孝乎鄧攸羊祜皆無後
者也得謂之不孝乎天下蟲豸雀鼠跂行喙息之物靡

不。照。嫗。鞠。育。孳。孳。愛。其。雛。其。心。豈。以。爲。後。哉。陰。陽。之。生。
機。使。然。耳。人。爲。萬。物。之。靈。當。以。禮。節。之。聞。足。下。喪。愛。子。
毀。過。盲。夏。過。矣。足。下。之。齒。猶。未。也。爲。邑。令。邑。中。人。皆。足。
下。子。使。子。孫。祀。我。不。如。使。桐。鄉。人。祀。我。于。足。下。何。憂。且。
聞。足。下。慈。幼。之。道。亦。頗。未。善。耶。君。甫。周。辟。衣。之。貂。食。以。
參。朮。又。引。其。痘。瘍。而。投。以。諸。猛。厲。藥。此。其。愛。也。乃。其。所。
以。害。也。夫。明。珠。美。玉。天。下。之。至。寶。也。愛。而。篋。藏。之。則。全。
佩。之。戴。之。亦。全。卽。棄。之。野。田。草。露。無。不。全。也。若。朝。則。濯。
於。水。暮。則。弄。諸。掌。夕。又。捧。而。摩。諸。席。目。營。手。撥。必。有。一。
朝。之。敗。兒。寵。過。則。驕。其。性。養。過。則。弱。其。身。不。可。不。察。也。
足。下。異。日。有。子。當。思。我。言。

舜不告而娶之說僕嘗疑之安有帝女下降九男同
來而瞽竟茫然乎瞽卽以瞽故爲舜欺矣彼象母與
象獨不日擊而告舜乎堯爲何如天子而瞽能禁其
妻舜乎瞽能禁之于娶前獨不能照之于娶後而胡
不卽以不告爲舜罪乎此與二妯治朕棧之說同一
無稽偶因論無後之說而并質之高明

與楊生書

僕壹不知夫論士者輒曰某也聰惜不說學耳某說學惜不虛已耳此其說殊不然論語曰敏而好學惟其敏故好學記曰學然後知不足惟其學故知不足背者反是雖然有天焉天生林林者千百萬人不甚經意也生一人焉將使之不朽于千百萬人之中則必有意鄭重而以其全與之故過人之資嗜學之癖極虛之心三者常兼古傳人如列大坐席參錯相望誰則不然賢叔笠湖以生詩來讀之知生非偶然生者且云錫山俗好博拚生居其間不一遊目而惟詩書之娛愈知生非偶然生者僕不忍負天所以生生之意故舐摘來詩毫髮不

假意不能母怯生之惋之也昨接手書相從如轉圜然
後知生之得于天者大矣生年才十七耳僕如生年時
絕不如生然則生如僕年時豈止勝僕也晉文公年十
七得賢士五人枚皐年十七赴闕上書生非其等夷耶
學琴者下指不協終身不能音天下事非天所寵者人
不能強而襲之也生已寵于天慮未寵于人而書詞慊
慊句僕爲知己嚙過矣夫從古前賢後賢相須而益彰
者勢也然後賢之須前賢可緩而前賢之須後賢甚急
何也崑山之璧雖無卞和其終發露寶貴無疑也若沉
檀死後之芬無餘風揚之則幾乎息矣夫道若大路然
豈難知哉卽如僕所告生者非有所受于人也而忽自

得之然則以生之才而學之不已安知其所自得者不
更進于僕之所告耶僕老矣然私心若不欲其老者豈
其愚而有所戀于光陰哉良以著述粗成傳之其人之
難也今而後僕其可老矣乎孔子畏天命畏大人畏聖
言而又畏後生以幼稚後生而躋之于天命大人聖言
之列得毋小過然試思當日若無七十子則孔子亦不
得有今日矣後生可畏耶不可畏耶生今之後生也挾
可畏之具而又遇畏後生之人其將何以報畏者

答戴敬咸孝廉書

東鄉先生殉節前朝其人原無假文傳者也既以文傳則不得不以文論僕前日摘其文之非還書時與到語耳草草塗抹過亦不復省矣足下書來護持東鄉不將前所摘者爲之指辨而但敘述明季處士之弊文體之荒蕪以推尊東鄉不惑之功可謂善尊東鄉者也僕尚何言雖然僕釋褐早時文之學淺所見明季時文尤少如足下所引爾時調語今年近六十始得聞之東鄉能拒而排之誠善惜其所排者乃不過李卓吾何心隱一流識人所共識之妖魅逐人所共逐之盜賊在昔文運晦冥時或以爲難而在今日觀之似亦戴天履地之民

秉夷同然不足爲東鄉異也。足下善善從長爲護持古
人起見。僕敢再多言。以自走不仁之域哉。乃來書因論
東鄉而詆及蘇子美。一賢未起一賢又顛。使僕不得不
瞿瞿然駭且疑。孔子曰。有德者必有言。孟子觀遠臣以
其所爲。主子美。天災三疏侃侃正言。似有德者其少也。
杜祁公婿之。其官也。范希文薦之。其罪也。韓魏公救之。
其所爲主也。賢矣。所傳得罪詩甚悖。本傳無之。與其集
中諸咏亦頗不類。安知非常時忌者。如王拱辰輩爲一
網打盡之計。造作蜚語以相誣陷。與歐公帷薄不修之
謗同一冤酷。而足下信爲口實。欲以大辟當之。恨其貶
官猶爲漏網。嗟乎。嗟乎。子美以一醉飽之過。旣不獲雪。

于生前更不獲申于死後尤仁人之所痛也且足下以尊東鄉故波及子美因子美故怪及歐公亦知當時愛子美者寧止一歐公耶歐公所謂擊而去之者意不在子美蓋指祁公及范富諸賢也子美去而祁公罷祁公罷而范富諸賢亦罷是子美一身之黜陟關慶歷一朝之盛衰而足下以護持東鄉之故忽生異議并諸賢一切抹殺恐東鄉有知亦必蹙蹙不安于地下也再考周公孔子驅爲奴乃是王直柔之詞即使真有此詩與子美無涉而况詩人放歌多不可爲典要杜少陵聖于詩者也亦有孔丘盜跖俱塵埃之句夫齊孔跖亦何異于奴周孔然而未聞古之人有罪少陵者則亦不以辭害

義也。從來人心之不同論古尤甚。一孟子也。而皮日休尊之。溫公非之。一楊雄也。而昌黎尊之。東坡非之。誰從乎。誰信乎。孰是乎。孰非乎。鄙意以爲尚論者必發千古不可不發之難。而後可以自存其說。其他小小是非。有傷賢者。則或爲時代所隔。或因稗史而訛。我輩疑于心。不必見于口。見于口。不必形于筆。形于筆。不必垂爲文。東鄉文字之疵。自有公論。僕因未而足下。故率意筆之。誠過也。而足下洋洋千言。將爲可傳之文。以痛斥子美。則是效吾尤而又甚之。是亦不可以已乎。願足下卽以愛東鄉者愛子美可也。僕之心卽足下之心也。

答尹相國書

枚愚不能慎厥身使公絕投杼疑又不能以自隱無名
爲務累公思心潭潭屢寄危言警懍震動之枚始而瞿
然曰公恩我不知我繼而愴然曰長者大人之愛嬰兒
也豈待其有疾而后憂耶其平時之燥濕寒暑蓋無時
不兢兢也且近前猶可耳離之愈遠則憂之愈深公之
于枚毋寧類是雖然兒壯矣有疾以貽長者憂不可無
疾而不能以無疾之故曉長者解其憂尤不可枚固不
然孔子曰君子坦蕩蕩孟子曰王者之民皞皞如也公
之不欲枚坦皞也將以枚不足爲君子乎抑不知今爲
王者之世乎枚乞養山居原不敢望履舄于公之門矣

而公挾師傅之尊強召之宿留之出詩文以唱喝之所
以然者牙琴相應啓予者商公之近枚者公之所以自
爲而非爲枚也世人不察但見公紆尊降貴有意其存
之遂謂公寵枚縱枚過譽枚聽從枚而枚于公前之不
乞一恩不干一事不妄一語不受一賜者則非外人之
所得而知也于是耽耽然環起而辟倪焉嗟乎嗟乎是
何異闌猿檻鶴偶一玩弄于王公貴人之前旁觀者疑
若奇榮極耀而孰知猿鶴之心以爲有苦而欲逃也久
矣枚爲公故招人多言公又爲人多言故加枚訓詞恩
勤不已祇益爲累蓋亦淡置夫夫也而聽其相忘于江
湖之爲安也哉說者又謂窮居故宜加謹是言也枚尤

非之夫因窮居而加謹將必因顯貴而太縱也是奚可也。今聖世雍熙草木羣生之物皆有以自樂而士君子乃戚戚嗟嗟如含瓦石不與無病而自灸者等乎。然而公之心枚亦知之公出入中外垂四十年小心謹慎未嘗有過猶抱安不忘危之志乾乾日昃師弟契深吉凶同患枚倘顛蹶必先累公公之戒枚者又公之所以自爲而非爲枚也。然枚每見焚輪之風拔木而不拔草者何哉其質微故其身易安耳而況天下禍福榮辱之權操之者天子贊之者相公公爲相公贊天子自有大中之道稱物平施海內人方倚公如泰山之安而奚有于一閉門垂老之門下士夫何憂何懼倘公不見

其大不深悉其人而徒抱慈心苦口逢寄聲人便諄諄
聒耳彼不知者將疑枚必有大無狀事積于公心而代
之憂危不已未爲人所陷先爲人所輕殊非愛人以德
之義昔人疑孔明文采不艷而過于丁寧周至陳壽以
爲孔明與衆人凡士語不得不然枚固衆人凡士而公
之丁寧則已過矣孔子雖聖而子路不悅故不覺率爾
一言

與邵厚菴太守論杜茶村文書

詩。文。之。道。寧。苟。作。毋。苟。許。不。知。而。作。烏。知。其。不。後。有。進。也。非。所。許。而。許。焉。將。惑。於。是。矣。是。不。可。不。辨。也。枚。嘗。核。詩。寬。而。核。文。嚴。何。則。詩。言。志。勞。人。思。婦。都。可。以。言。三。百。篇。不。盡。學。者。作。也。後。之。人。雖。有。句。無。篇。尚。可。采。錄。若。夫。始。爲。古。文。者。聖。人。也。聖。人。之。文。而。輕。許。人。是。誣。聖。也。六。經。文。之。始。也。降。而。三。傳。而。兩。漢。而。六。朝。而。唐。宋。奇。正。駢。散。體。製。相。競。要。其。歸。宿。無。他。曰。顧。名。思。義。而。已。名。之。爲。文。故。不。可。但。也。名。之。爲。古。故。不。可。時。也。古。人。懼。焉。以。昌。黎。之。學。之。才。而。猶。自。言。其。迎。而。距。之。之。苦。未。有。絕。學。捐。書。而。可。以。操。觚。率。爾。者。枚。前。席。間。貶。茶。村。文。太。守。色。不。

許我以見彼文絕少未敢爭之固辨之疾今賜變雅堂
集讀之文之未是又安論其古不古也然茶村至今尚
不至于艸亡木卒者亦有故焉當鼎革時諸名士流離
江湖結社羣居足已而不學其諸老先生多晚節不臧
欲然病乎已遇勝國士人爭羅致煥咻之冀免其清議
而其時嘗稱逸民者遂乘其虛而劫焉往往麗破履登
高座居之不疑以爲李杜韓蘇搖筆便是旣無薊懷之
苦心又無畏友之礪切借國家危亡盜竊名字蓋不止
茶村然也使生今日文教單敷之時荆楚一僮技止此
乎久沒沒矣孔北海曰今之後生喜謗前輩所以然者
爭名故耳枚雖不肖必不爭名於茶村願公且置茶村

之得失而先考古文之源流久後見覆何如

答友人某論文書

人。必。有。所。不。能。也。而。後。有。所。能。世。之。無。所。不。能。者。世。之。
一。無。所。能。者。也。和。之。弓。垂。之。矢。非。古。之。能。者。乎。垂。非。不。
能。爲。弓。和。非。不。能。爲。矢。也。然。而。可。傳。者。一。人。一。物。而。已。
也。伯。夷。典。禮。則。棄。樂。孔。子。學。射。則。舍。御。分。爲。四。科。判。爲。
六。藝。不。以。其。所。能。者。傲。人。不。以。其。所。不。能。者。病。已。秦。學。
不。兼。方。漢。亦。然。宋。以。後。人。心。不。古。喜。多。爲。之。沿。其。流。而。
不。溯。其。源。夫。是。故。雖。能。之。而。與。夫。不。能。者。亦。無。以。異。也。
僕。不。敢。自。知。天。性。所。長。而。頗。自。知。天。性。所。短。若。箋。註。若。
歷。律。若。星。經。地。志。若。詞。曲。家。言。非。吾。能。者。決。意。絕。之。猶。
恨。其。多。愛。而。少。棄。也。學。杜。韓。亦。爲。元。白。好。韓。柳。亦。爲。徐。

庾汲汲顧影如恐不及方欲捐兩鵞以求其精而不謂足下之就其病而深之也足下來教曰詩不如文文不如著書人必兼數者而後傳此悞也夫藝苟精雖承蜩畫筴亦傳藝苟不精雖兵農禮樂亦不傳傳不傳以實求不以名取安在其兼不兼也然僕意以爲專則精精則傳兼則不精不精則不傳與足下異矣若謂詩文不如著書僕更不謂然周秦以來作詩文者無萬數誠如尊言矣著書者亦無萬數足下獨未知之乎擷藝文志未必文集俱亡而著書獨在也僕疑足下於詩文之甘苦尚未深歷故覺與我爭名者在在皆是而獨震於考訂家瑣屑班駁以爲其傳較可必耶又疑詩文之格調

氣。韵。可。一。望。而。知。而。著。書。之。利。病。非。搜。輯。萬。卷。不。能。得。其。癥。結。故。足。下。渺。視。乎。其。所。已。知。者。而。震。驚。乎。其。所。未。知。者。耶。要。知。爲。詩。人。爲。文。人。談。何。容。易。入。文。苑。入。儒。林。足。下。亦。宜。早。自。擇。寧。從。一。而。深。造。毋。泛。涉。而。兩。失。也。嗟。乎。士。君。子。意。見。不。宜。落。第。二。義。足。下。好。著。書。僕。好。詩。文。此。豈。第。一。義。哉。古。之。人。其。傳。也。非。能。爲。傳。也。乃。不。能。爲。不。傳。也。何。也。使。人。謀。傳。我。則。易。而。我。自。謀。其。傳。則。難。也。僕。與。足。下。生。盛。世。不。能。爲。國。家。立。萬。里。功。活。百。姓。又。不。能。伏。丹。墀。侃。侃。論。天。下。事。并。不。能。爲。游。徼。齋。夫。使。鄉。里。敬。之。信。之。而。乃。欲。爭。名。于。蠹。簡。中。狹。矣。然。僕。竊。喜。自。負。者。王。荆。公。云。徒。說。經。而。已。者。必。不。能。說。經。僕。固。非。徒。爲。

詩文者也。或與夫足下所引終身著書諸人其容有間乎。

答友人論文第二書

客冬蒙寄古文七篇讀畢思有所獻替忽忽少暇入春
來歸妹於揚州篋口賓婿勞不可支比來稍閒敢白所
懷以諍足下竊謂足下之爲古文是也足下之論古文
非也足下之言曰古文之途甚廣不得不貪多務博以
求之此未爲知古文也夫古文者途之至狹者也唐以
前無古文之名自韓柳諸公出懼文之不古而古文始
名是古文者別今文而言之也劉今之界不嚴則學古
之詞不類韓則曰非三代兩漢之書不觀柳則曰懼其
昧沒而襍也廉之欲其節二公者當漢晉之後其百家
諸子未甚放紛猶且懼染於時今百家回冗又復作時

藝弋科名如康崑崙彈琵琶久染淫俗非數十年不近
樂器不能得正聲也深思而慎取之猶慮勿暇而乃徇
于靡襍以自消過矣蓋嘗論之古書愈少文愈古後書
愈多文愈不古商書渾渾爾夏書噩噩爾作詩者不知
有易作易者不知有詩下此左穀以序事勝屈宋以詞
賦勝莊列以論辨勝賈董以對策勝就一古文之中猶
不肯合數家爲一家以累其樸茂之氣專精之神此豈
其才力有所不足而歲月有所偏短哉荀子曰不獨則
不誠不誠則不形天下事不徒文章然也鄭康成以禮
解詩故其說拘元大山好書故其文碎蘇長公通禪
理故其文蕩之數公者皆抱萬夫之稟者也偶有所襍

其弊立見而況其下焉者乎。今將登騷壇樹旗幟召海
內方聞綴學之徒而談論角逐以震耀乎口耳。此非煩
稱博引不可也。邯鄲淳之見東阿王李諧之遇梁武帝
是也。若夫傳一篇之工成一集之美閉戶覃思不蹈襲
前人一字而卓然爲行遠計此其道誠不在是矣。足下
擅鹽菰名居淮南之四衝四方之士于焉來請謁者
或經或史或詩或文或性理或經濟或蟲魚箋註或陰
陽星歷醫卜日星其伎於左右足下不涉獵而遍覽焉
幾惜乎爲酬應而又以好賢之心好勝之氣日習於諸
往來者之咻染不覺耳目心胸常欲觀五都而遊武庫
然藉此多聞多見使人一談論一晉接驚而詫於四方

曰名士名士則可也。竟從此以求古文之真而拒專門者之諫則不可也。足下之答綿莊曰散文多適用駢體多無用文選不足學此又誤也。夫高文典冊用相如飛書羽檄用枚舉文章家各適其用。若以經世而論則紙上陳言均爲無用。古之文不知所謂散與駢也。尚書曰欽明文思安安。此散也。而賓於四門納於大麓。非其駢焉者乎。易曰潛龍勿用。此散也。而體仁足以長人。嘉會足以合禮。非其駢焉者乎。安得以其散者爲有用而駢者爲無用也。足下云云蓋震于昌黎起八代之衰一語而不知八代固未嘗衰也。何也。文章之道如夏殷周之立法窮則變變則通。西京渾古至東京而漸漓一二文

人。不。得。不。以。奇。數。之。窮。通。偶。數。之。變。及。其。靡。曼。已。甚。豪
傑。代。雄。則。又。不。屑。雷。同。而。必。挽。氣。運。以。中。興。之。徐。庾。韓。
柳。亦。如。禹。稷。顏。子。易。地。則。皆。然。者。也。然。韓。柳。亦。自。知。其。
難。故。鏤。肝。鉢。腎。爲。與。博。無。涯。涘。或。一。兩。字。爲。句。或。數。十。
字。爲。句。拗。之。練。之。錯。落。之。以。求。合。乎。古。人。但。知。其。戛。戛。
獨。造。而。不。知。其。功。苦。其。勢。危。也。誤。於。不。善。學。者。而。一。瀉。
無。餘。蓋。其。詞。駢。則。微。典。隸。事。勢。難。不。讀。書。其。詞。散。則。言。
之。無。物。亦。足。支。持。句。讀。吾。嘗。謂。韓。柳。爲。文。中。五。霸。者。此。
也。然。韓。柳。琢。句。時。有。六。朝。餘。習。皆。宋。人。之。所。不。屑。爲。也。
惟。其。不。屑。爲。亦。復。不。能。爲。而。古。文。之。道。終。焉。且。賢。者。之。
大。患。在。乎。有。意。立。功。名。而。文。人。之。大。患。在。乎。有。心。爲。關。

係古之聖人兵農禮樂工虞水火以至贊周易修春秋
豈皆沾沾自喜哉時至者爲之耳若欲冒天下難成之
功必將爲深源之北征安石之新法欲著古今不朽之
書必將召崔浩刊史之災熙寧僞學之禁今天下文明
久已聖道昌而異端息矣而于此有人焉褒衣大袂猶
以孟軻韓愈自居世之人有不怪而嗤之者乎夫物相
襍謂之文布帛菽粟文也珠玉錦繡亦文也其他濃雲
震雷奇木怪石皆文也足下必以適用爲貴將使天地
之大化工之巧其事生布帛菽粟乎抑能使有用之布
帛菽粟貴乎無用之珠玉錦繡乎人之一身耳目有用
鬚眉無用足下其能存耳目而去鬚眉乎是亦不達于

理矣。韓退之晚列朝參朝廷有大著作多出其手如淮
西碑順宗實錄等書以爲有絕大關係故傳之不衰而
何以柳州一老窮兀困悴僅形容一石之奇一壑之幽
偶作天說諸篇又多譎詭悖傲而不與經合然其名卒
與韓峙而韓且推之畏之者何哉。文之佳惡實不係乎
有用與無用也。卽足下論文如射之有志可謂識所取
舍者矣。而何以每見足下于莊屈之荒唐則愛之而誦
之于程朱之語錄則尊之而遠之豈足下之行與言違
哉。蓋以理論則語錄爲精以文論則莊屈爲妙足下所
愛在文而不在理則持論雖正有時而嗒然自忘若夫
比事之科條薪水之雜記其有用更百倍于古文矣。而

足下不一肄業及之者何也三代後聖人不生文之與道離也久矣然文人學士必有所挾持以占地步故一則曰明道再則曰明道直是文章家習氣如此而推究作者之心都是道其所道未必果文王周公孔子之道也夫道若大路然亦非待文章而后明者也仁義之人其言藹如則又不求合而合者若矜矜然認門面語爲真諦而時時作學究塾師之狀則持論必庸而下筆多滯將終其身得人之得而不自得其得矣竊爲足下憂之綿莊文多說經絕不類選體而以之勗足下者彼見足下筆氣近弱不宜散文故以六朝綿麗之體進非得已也足下不善用其短而損之過堅僕愛足下過于綿

莊安得不再爲忠告

答友人論文第三書

初一日接手書所論駢體已是不復置辨論古文與博學猶有曩之見存安得不再申之夫古文之宜博非足下之所謂博也韓子稱其書滿家而六經外不過子雲相如屈原太史而已柳白矜旁推交通而六經外不過穀梁孟荀莊老而已此外非所博也足下之言曰昌黎以陰陽土地星辰方藥未通爲愧故將通之以合乎昌黎之說不知昌黎果通之而後爲古文乎抑終於未通而所以爲古文者固自有在乎其詞曰未有不通此而爲大賢君子非曰必通此而後爲古文也僕所論者古文非論大賢君子也足下能爲大賢君子而又能爲古

文。僕。豈。不。更。敬。且。畏。然。而。有。以。知。足。下。之。不。能。也。何。也。
足。下。之。博。不。博。未。可。知。而。足。下。文。之。古。不。古。則。可。見。也。
求。其。不。古。之。故。而。不。可。得。則。不。得。不。咎。其。所。務。之。駁。所。
貪。之。多。譬。如。侍。病。者。見。其。沉。疴。之。未。痊。必。疑。某。藥。眩。耶。
某。食。哽。耶。若。果。不。善。必。聽。其。放。飯。流。歎。而。不。問。矣。僕。告。
勸。足。下。勿。務。雜。學。足。下。亦。宜。深。自。反。而。猶。執。前。說。爲。斷。
斷。是。何。不。相。悉。之。甚。也。古。徐。之。才。裴。子。野。僧。贊。寧。能。通。
雜。家。而。古。文。無。有。韓。柳。歐。曾。不。能。通。雜。家。而。古。文。實。傳。
僕。知。足。下。二。十。年。知。足。下。之。能。爲。裴。徐。爾。能。爲。韓。歐。爾。
必。謂。足。下。能。裴。徐。又。兼。韓。歐。則。未。敢。也。張。平。子。學。窮。造。
化。而。其。言。曰。官。無。二。業。事。不。並。濟。畫。長。則。宵。短。天。且。不。

能兼而況于人乎。傅武仲身列文苑而其言曰：二志靡成，聿勞我心。如彼兼聽，則溷于音。陸士龍文患才多，而其言曰：矜目者尚奢，愜心者貴當。荀子曰：藝之精者，不兩能；大戴禮曰：君子知不務多而務審其所知。尸子曰：同能不如獨勝。管子曰：雜物不爲性，雜學不爲儒。足下方務博以爲古文，而于諸君子之言如尚未見者，又奚以博爲？

與薛壽魚書

談何容易。天生一不朽之人。而其子若孫必欲推而納之。于必朽之處。此吾所爲惻惻而悲也。夫所謂不朽者。非必周孔而后不朽也。羿之射秋之弈。俞跗之醫。皆可以不朽也。使必待周孔而后可以不朽。則宇宙間安得有此紛紛之周孔哉。子之大父一瓢先生。醫之不朽者也。高年不祿。僕方思輯其梗槩。以永其人。而不意寄來墓志無一字及醫。反託于與陳文恭公講學云云。嗚呼。自是而一瓢先生不傳矣。朽矣。夫學在躬行。不在講也。聖學莫如仁先生。能以術仁其民。使無天札。是卽孔子老安少懷之學也。素位而行。學孰大于是。而何必捨之。

以他求陽明勛業爛然胡世寧笑其多一講學文恭公亦復爲之于余心猶以爲非然而文恭相公也子之大夫布衣也相公借布衣以自重則名高而布衣挾相公以自尊則甚陋今執途之人而問之曰一瓢先生非名醫乎雖子之仇無異詞也又問之曰一瓢先生其理學乎雖子之戚有異詞也子不以人所共信者傳先人而以人所共疑者傳先人得毋以藝成而下之說爲斤斤乎不知藝卽道之有形者也精求之何藝非道貌襲之道藝兩失燕噲子之何嘗不託堯舜以鳴高而卒爲梓匠輪輿所笑醫之爲藝尤非易言神農始之黃帝昌之周公使冢宰領之其道通于神聖今天下醫絕矣惟講

學。一。流。轉。未。絕。者。何。也。醫。之。效。立。見。故。名。醫。百。無。一。人。
學。之。講。無。稽。故。村。儒。舉。目。皆。是。子。不。尊。先。人。于。百。無。一。
人。之。上。而。反。賤。之。于。舉。目。皆。是。之。中。過。矣。卽。或。衰。年。無。
俚。有。此。附。會。則。亦。當。棄。道。書。之。而。不。可。盡。收。其。所。由。來。
僕。昔。疾。病。性。命。危。篤。爾。時。雖。十。周。程。張。朱。何。益。而。先。生。
獨。能。以。一。刀。圭。活。之。僕。所。以。心。折。而。信。以。爲。不。朽。之。人。
也。慮。此。外。必。有。異。案。良。方。可。以。拯。人。可。以。壽。世。者。輯。而。
傳。焉。當。高。出。語。錄。陳。言。萬。萬。而。乃。諱。而。不。宣。甘。捨。神。奇。
以。就。臭。腐。在。理。學。中。未。必。增。一。僞。席。而。方。伎。中。轉。失。一。
真。人。矣。豈。不。悖。哉。豈。不。惜。哉。

答某生書

春間寄所鐫雕蟲樂府來僕至今未答隨接手書至于再至于三不知僕所以不答之故而以前書未到爲疑然則僕敢再不答以陷足下終身不知之過哉古之人無自鐫其文者今所傳諸集皆當時之門生故吏尊師其人而代爲鐫傳之非夫人之所自爲也晉相和凝鏤集百卷人多非之足下齒猶未也不必爲和相之所爲然旣已不求益而欲速成矣則必使字帖句妥可幾于成而后卽安不可使人聞其集名而先哂然笑也夫使人笑其命集之名則將不復觀其集而束之高閣求名失名爲計已左雕蟲二字見考工記樂府二字見霍光

傳足下合而名之於義何當若曰謙詞云爾則將來足下之詩日多謙口甚名樂府曰雕蟲名五古七古五律七律又曰雕蟲乎莊子蟲天之道何太紛紛也是詩也僕久已擧之尊集矣足下不以爲然亦宜往復辨難使僕噤無所答而後仍其原名固未晚也今一無商榷而卽鐫傳之又寄以曉示之疎耶悞耶揭吾前言以爲大愚耶半閒堂一首去後二句味較深亦曾擧之尊集矣足下又不以爲然而仍鐫其舊則是僕所獻替于左右者竟一無可也夫人心之不同各如其面孔子雖聖而子路不悅以鄭康成之名之學而郗原終不以爲師此固兩無所妨乃足下旣不遠千里而來師僕矣凡所褒

揚語全鐫之以耀于人師其所是而不師其所非將毋
足下之取師在于標榜阿諛而不在于聞道祛惑也古
之師人者不如是古之爲人師者不如是學問之道若
涉大海其無津涯僕老矣不復求名然文字間苟有一
字之商雖幼子童孫必虛已師之而不敢自恃足下拒
吾言果別有意義可以佐晚聞而啓老瞶者幸其未死
時早教之俾得返束脩改名紙趨門外以俟焉文中子
年十四王孝逸白首北面僕之師安知不在足下

與朱竹君學士書

枚不才不能迂其身小留館閣與當代之賢人君子黼
黻隆盛又早乞歸不復策簪長安望見名公卿履舄每
項項不得意然聞聲而遙相思者若動于天焉亦不自
知其所以然也公昆季以文學卓行同翔天衢爲海內
所輶服公又束修其躬志古人之所志學古人之所學
士林中原不齊其口異音同歎江南高才生爲枚所目
色者不北行則已苟北行試京兆禮部必一一被公羅
取枚聞之謹噪起舞以爲文章之公論果如是其有定
也文章之主持果如是其有人也雖然枚當知公公不
當知枚何也天之卿雲朝陽之鳴鳳雖山澤之癯仰而

窺所共見者也。若夫江湖間老物散材，要惟耦居者知之。其高而麗於天者，未必降階越境以存之，也不意秀才陳熙來道，公問枚甚悉。進士程沅來，又道公爲護持枚，故挺身說人，嗜枚之與公名，紙未嘗通也。譬教未嘗接也，縱左右之人妄有稱引，又安知非阿所好以誑公而胡乃眷私若是然，則使枚竟幸而得近，顏行布露所畜抱三十年著述，拜獻於中衢之車下，不知公之矜寵而教督之者，又將何似也。昔孔北海爲楊彪緩頰，裴監州爲傅蘭碩通兩家之好，皆卓卓史冊間然，皆先狎交之後，覆露之較公之未見其人而爲之道地者，果孰賢也。枚年逾五十，鬬然而齒墮矣。當事風稜言言亦無所

于加委化任天百事頽廢惟敬賢感知已之意老而不
衰恐旦暮溝壑死抱受恩不知之憾又恐公挂念猿鶴
未審誣譏效否仁心拳拳故通一函告平安而抒報謝
願見無日我懷如何

答朱竹君學士書

仲夏讀執事書錯落與衍愛執事之文之古苦言至意敬執事之心之古道枚冠長纓試京兆時曾早日之正如執事之仁風枚亦早耳之也三十年來兩相思兩不知天若欲兩人者相見而使執事持節來又若欲兩人者不輕相見而使見訪時枚又避宅他適母乃故鬱其心支閤其意見以誘其所欲言者而俾之兩相益乎書中以隱目枚似非知枚者當今天下有道枚何敢隱卽或希踪巢由而巢由者聖世之惰民非枚所喜枚鮮兄弟母老以是辭官非隱也若勗以韜晦使人不知其美云云斯言也得母有繩息媯以詘楚子者乎枚聞之報

然不覺汗之竟趾也。枚伏荒山中，朴蒙孤陋，與村氓居。如女子然，旣未嘗搔頭弄姿，招塗之人而曰：「余美。」勢亦不能漆身毀形，赫塗之人而曰：「余不美也。」而隣母見愛，猶寄聲閨中而訓之曰：「汝何故冶容？汝得毋謫淫彼姝者乎？」將輩慙而何所謝過耶？枚犬馬齒，歲月食斗米不盡。夫何爲哉？亦安居以適性耳。思以卒業而已矣。若夫避傷之說，枚不謂然。傷非周孔之所能避也。枚何人能避傷乎？夫被甲者所以防矢之至也，未登矢石之場而家居被甲固不可也。古今來叔夜傲而傷，韋元恭而亦傷，安仁富而傷，蘇虞貧而亦傷。宇宙間皆傷機也。聖人知其如此，故以未濟終篇。而子乾之文言則曰：「知進退。」

存亡而不失其正者其惟聖人乎言雖聖人不能不退不能不亡但能不失其正而已宋明帝戒王景文云有心于避禍不若無心以任運但人生自應卑慎行已用心務思謹惜斯言也枚終身誦之執事無憂焉雖然枚亦何足當執事注存哉傷一匹夫與世何損王者之民嗶嗶如也聽其自存自沒可矣執事官清要負萬夫之望正須隆赫彰施使天下人共仰其美沾其美而後可以酬主知不負所學倘亦匿美避傷而欽欽作自全謀則盛業叢脞人望休矣豈所期于長者大人哉枚聞訾我貨者願與我市刺我行者願與我交枚感執事願交之義而愈引其願交執事之心故借執事規我者以

規執事

附來書

戊午之秋八月十日先生冠長纓立貢院牌坊下自
誦其試文時常熟讀先生貴形自龍門出就先生語
時筠年甫十齡一望見識之後長大相聞不復見二
十五六獲為館中後進先生方出官江之南聞其風
采所至治聲既聞抽手板引去卜築于古金陵以金
石圖書篆于江山之間自謂循吏儒林隱逸三者兼
之筠心慕其意趣以為近今未嘗有也筠自問無所
知識然聞志乎古不逐逐于流俗者身雖不能未嘗
不心敬之而流俗之人猶薰然起而辨且正之此筠
身雖無權與勇未嘗不欲毅然起而先生何所聞而曲
獎之也筠比來得聞先生梗概于魚門畧詳竊願有
所進者君子之處世不可示人隱而示人尤未可也
離場之鶴集于林而人或傷其羽縱其未傷知其羽
之美而傷之者至若夫鴈鵠鴛鴦人孰從而知其美
耶筠竊願先生之使人不能知其美也昨冬過訪隨
聞不得見投刺悵悵而去如有所失大著固願見尤
願得侍坐于左右一談其累年之未得見也辱再賜
手書泰學士寄筠出都始獲讀之孟陬所寄又

未遑卽啓往來乎心欲一致其區區而言之不知其
起止頃將往徽歙間不能已于言輒敢陳之餘可以
書奉

答尹似村書

書來怪僕背宋儒解論語若欲關其口而奪之氣者僕頗不謂然孔子之道大而博當時不違如愚者顏氏子而已有若宰我智足以知聖人終有得失趨庭如子思私淑如孟軻博雅如馬鄭俱有得失豈有千載後奉一宋儒而遽謂孔子之道盡是哉易曰仁者見之謂之仁知者見之謂之知孟子曰夫道若大路然豈難知哉苟其得雖滄浪之童子歌之而心通苟其失雖亞聖之顏回瞻之而在後宋儒雖賢終在顏曾以下僕雖不肖或較童子有餘安見宋儒盡是而僕盡非也西漢傳經各有師承各自講解以相授受最爲近古東漢好名何休

鄭元趙岐之流始爲箋註門戶債興然猶在名物象數
間耳未有空談心性而不許後人叅一議者也中庸曰
博學之審問之書曰好問則裕自用則小使宋儒而果
賢也有不審問者乎有肯自用者乎若一聞異已者而
卽怒是姦佞木強者耳烏乎賢今有將鬻貨至長安者
雖五尺之童適市聽其擇價取庸而問路可也有賤丈
夫焉壘斷而把持之以爲非出乎已不可清明之吏必
嚴禁之今之仁義道德貨也聖賢長安也周孔之書路
之昭昭者也漢唐晉宋諸儒皆可以擇價取庸而問路
者也必欲抹撥一切而惟宋儒是歸是亦田儼市儈之
把持者而已矣古之人往往有始願不及此而後人報

之已過者。關忠武。忠于漢室。此其志也。豈料後之隆。以
帝稱哉。宋儒闢宣周孔。此其志也。豈料後之垂爲令甲
哉。且安知其著書時。不望後世賢人君子。爲之補過。拾
遺。去其非。存其是。以求合聖人之道乎。自時文興。制科
立。大全頒。遵之者貴。悖之者賤。然後束縛天下之耳目。
聰明。使如僧誦經。伶度曲而後止。此非宋儒過尊宋儒
者之過也。今天下有二病焉。庸庸者習常隸舊。猶且不
暇。何能別有發明。其長才秀民。又多苟且涉獵。而不肯
冒不韙。以深造。凡此者。皆非尊宋儒也。尊功令也。功令
之與宋儒。則亦有分矣。僕幼時。墨守宋學。聞講義。畧有
異同。輒掩耳而走。及長。讀書漸多。入理漸深。方悔爲古

人所囿足下亦宜早自省毋輕抱宋儒作狹見謾闢之
迂士并毋若僕聞道太晚致索解人不得

再答似村書

覆書道爲後學者不宜排前儒此又悞也夫排之云者
擠而奪之之詞也將立說而先懷擠奪之心則其心術
已僨而其說必悖僕雖食月食斗米不盡尚何羨于兩
廡特豚之饋而爲是喋喋哉所以然者是非之心人皆
有之周公大聖召公大賢尚不相悅孔融執子孫之禮
事康成而于麟鼓郊天之說則直斥其臆造君子和而
不同理宜如此非所謂排也足下又問似村背宋儒將
何以應試弋科名則更悞矣科名者出身之末也學問
者立身之本也三代後立身之與出身分也久矣學校
廢言揚行舉廢辟召徵聘又廢士君子出身舍科目其

奚從求科目舍功令其奚從今孔孟復生其務科目而尊宋儒無疑也況似村乎要其胸中之黑白必有昭昭然不同于俗學者矣韓昌黎唐進士也其言曰爲今進士文章下筆大慙昌黎肯慚所以爲昌黎雖慚肯下筆所以成進士似村且慚且下筆法昌黎可也而何指南之問焉宋儒之學首嚴義利之辨講學義也決科利也朱儒當時早知後世以其學爲干祿之書則下筆時必恥爲之似村乃因科第而尊宋儒豈善尊宋儒者乎竊以爲今之善尊宋儒者莫僕若耳夫善交友者忠告善道有過必規善事君者繩愆糾謬納之于堯舜僕讀宋儒集註決科名得有今日常慮無以報古之賢人故有

一知半解必標出之爲宋儒補偏救弊以俟後之君子
子產曰從政有所反之以取媚也孟子曰齊人莫如我
敬王也果起宋儒于九原必以僕爲諍臣畏友感謝不
暇而似村乃嘗其好翹人過以爲名高不已誤乎總而
論之漢唐晉宋諸儒俱有功于孔子俱爲僕所敬畏宋
儒立身亦卓卓可師然僕于漢唐諸儒無所辨而于宋
儒有微詞者何也譬如易牙烹調之味其不強余食者
亦淡而置之矣若朝饔夕飧非此不可則不能震其名
以爲彼治味者易牙也惟有縮額猛吞而不敢一加搗
嚼僕之不能不搗嚼道味僕之過也若夫以決科之私
心作衛道之公論非僕之所敢出也願似村尊宋儒可

不尊宋儒亦可尊宋儒而不善尊宋儒則大不可幸三
思母忽

與程戢園書

綿莊寄足下與彼之札來道顏李講學有異朱儒者足下以爲獲罪於天僕頗不謂然宋儒非天也宋儒爲天將置堯舜周孔於何地過敬隣叟而忘其祖父之在前可乎夫尊古人者非尊其名也其所以當尊之故必有昭昭然不能已于心者矣若曰人尊之吾亦尊之云爾是鄉曲之氓逢廟必拜者之爲也非真知所尊者也是足下尊宋儒尊其名乎尊其實乎尊其名非僕所敢知也尊其實則必求其所以可尊之故與人所以不尊之故兩者參合而慎思之然後聖道日明不宜一聞異詞如聞父母之名便掩耳而走也黃氏日抄稱呂希哲習靜

其僕夫溺死不知張魏公自言有心學符離之敗殺人三十萬而夜卧甚酣宋學流弊一至于此恐周孔有靈必歎息發憤於地下而不意我朝有顏李者已侃侃然議之顏李文不雅馴論均田封建太泥其論學性處能於朱陸外別開一徑足下不詳其本末不判其精粗不指其某也是某也非而一言以蔽之曰詆宋儒如詆天吾以爲足下非善尊朱儒者也孟子曰子路人告之以有過則喜宋儒而子路也聞顏李之告必喜而足下代爲之怒者何也且足下并非善尊天者也中庸曰天地之大人猶有所憾人憾天地而子思許之人憾宋儒而足下不許又何也足下之言曰無宋儒吾輩禽獸而

木石矣。尤悞也。足下亦思漢魏晉唐無宋儒。其間千餘年。皆禽獸木石乎。亦思以孔子之聖。不能挽戰國之末流。而以宋儒之賢。乃能救後世之習俗乎。足下懼獲罪于宋儒。而甘心獲罪于漢魏晉唐之儒。并甘心獲罪于孔子者。又何也。夫至獲罪于孔子。乃幾幾獲罪于天然。而豪傑之士。無文王猶興。足下無宋儒。乃自比於禽獸。木石。僕能決足下之必非禽獸。木石。猶之能決宋儒之必非天也。恭而無禮。悖莫甚焉。足下與綿莊辨。僕過而有言者。非助鬪也。僕以爲聽訟者。必使兩造畢其詞。而後斷焉。若抽戈結繩。勢若將訟。聽者便關其口。而奪之氣。雖父子相訟。亦不必若是之袒且遽也。足下守宋儒。

太狹詆顏李太遽竊以爲不可故布其區區

黃東發親傳朱子緒餘而日抄中頗有微詞其他門
人朋友各有異同劉靜菴大不喜中庸注自爲論以
駁其師曰天地之性人爲貴混人物而一之者非知
性者也慈湖楊氏疑大學誠意註悖論語毋意之說
陳止齋以爲淫奔偷期之所竊所未安南軒以註費隱
一概以爲淫奔偷期之所竊所未安南軒以註費隱
爲牽強伯恭以任道統爲客驕宋金華尤恪遵朱子
而深不取劾唐仲友一事以爲唐乃台之循吏特爲
補傳以補元史之缺此皆于一門戶中和而不同者
也况門戶以外者乎顏淵曰舜何人也子何人也有
爲者亦若是大賢于堯舜且然而况宋儒乎善尊朱
儒者宜知之故再自堯舜且然而况宋儒乎善尊朱

再與張園書

第二書論朱儒得失論正而氣和方知前札未盡招人
之疑然朋友切磋不嫌往復僕以爲後之貶朱儒者皆
講學而欲爭其席者也僕非講學者於朱儒乎何爭然
胸中之是非不尊朱儒宜辨尊朱儒尤宜辨事父母事
君且幾諫矣而況古之人乎足下所引朱儒謬悞者數
端皆昔人陳言不必再摘吾以此知足下之心得者少
也就中所稱格物宜兼室欲一語僕又非足下而是朱
儒夫聖賢學問自有條次所貴乎格致者如人行路必
先問程途郵驛當問路時雖至愎者有何成見雖至貪
者有何越思而何欲之可室乎室欲卽正心誠意也若

格物之功已兼窒欲則誠意正心爲贅語矣要知聖賢格致之時未嘗非誠意正心時也亦未嘗非修身齊家時也恐其悞誠悞正悞修悞齊故格物以致其知耳若必待其理窮知致而始正心誠意修身齊家也固已晚矣天下有心不正意不誠家不齊身不修而嚮焉然曰吾方格物吾方致知之人哉然則大學曰而后曰必先者其行文之道如是讀者不可泥也王文成格庭前竹七日不悟生疾遂求良知而詆宋儒不知物有本末大學已明言之文成不格其本而格其末於宋儒乎何尤若謂有宋儒而死節者多則與孩童之見無異史冊所載死難之人或出于武夫悍卒或出于匹夫匹婦其人

皆耳。不聞宋儒名目。不覩宋儒書者也。而何得以爲宋儒功也。人動稱六朝爲放達。不知說禮家如賀循袁準。范平摯虞輩精深。該博劉超鍾雅于蘇峻上殿時。猶授孝經論語。劉阿稱不束帶。不敢答兄之呼。其實學如彼。其實行如此。乃不能與宋儒一較。伯仲吾之所不解者。一也。六朝尊蔣帝。至於南郊。晉魏尊康成。至於王弼。一祇而死。今蔣侯無廟。學者不知康成爲何人。而其鬼亦不靈。此僕之所不解者。二也。古無詩韻。毛詩周易靡不含嚼宮商周顓陸慈偶創一家之韵。數傳失真。唐人班爲功。今以一天下之音。而宋儒竟遵之以叶文王周公之詩。此僕之所不解者。三也。時會所趨。氣運所關。功令

所束習俗所囿但順其當然而不必叩其所以然則僕
與吾子之辨息矣

答洪華峯書

頃接手書讀古文及詩嘆足下才健氣猛抱萬夫之裏而又新學簡河學士之學一點一畫不從今書駁駁落如得斷簡于蒼崖石壁間僕初不能識徐測以意考之書方始得其音義足下真古之人歟雖然僕與足下皆今之人非古之人也生今反古聖人所戒然而古有當反者有不當反者假作篆籀寧不溯所由來此古字之當反者也既作行楷何忽變其面目此古字之不當反者也足下作楷法而以從爲繇以夏爲憂此在冷唐人碑中容或見之而在歐虞諸大家所必無者也韓昌黎云欲作文必先識字所謂識者正識其宜古宜今之

義非謂摭摭一二忍富不禁而亟亟暴章之今南海碑尚存昌黎書法班班可考三代上重文不重字保氏所掌原無異同自秦失其道斯邈之徒紛然造作漢儒寫經竟有賄蘭臺令史以偷合其私文者故叔重進說文伯楷刊石經垂爲令甲原非得已卒之篆變隸隸變楷楷變行行變草風氣所趨日就簡便使許蔡生于今日亦難執所刊定以相拘閼孔子曰麻冕禮也今也純儉吾從衆以聖人之尊冠冕之重尚且從時足下爲唐宋以後之文而作唐宋以前之字是猶短衣楚製而猶席地搏飯捧魯人之梳篋不已悖乎且夫古字之與今字固有分而古俗之與今俗亦宜辨如寫雙爲雙今俗也

誤也。若以娛爲嬉，則古俗矣。庸何傷乎？寫裏爲裡，今俗也。誤也。若以逡爲移，則古俗矣。庸何傷乎？足下厭故喜新，必欲泥古以相侗喝，勢必讀穆天子傳，寫長寶爲尻。瓚讀詛，楚文寫親，成爲救，峨讀書，愈多矜奇，愈甚他日對策。王廷諸衡文官，必無好古如笥河者，少見多怪，徒遭駁放。顏元孫最辨字體，而千祿字書首言說文難據。宋子京最精小學，亦嘗笑楊備模倣古文尚書釋文。人呼怪物，足下之病得毋相類？且足下文果傳耶？雖字畫小差，而後之人必有爲之考据。字書校正重刊者，足下文果不傳耶？雖筆筆古法，而後之人必無因此相欽。肯當作字書讀者，足下不古其文，而徒古其字，抑末也。

上箚河學士一百十韵搜盡僻字僕尤不以爲然詩重
性情不重該博古之訓也然而如足下詩不足以爲博
何也古無類書志書韵書故三都兩京各矜繁富今三
書備矣登時闢入無所不可過後自讀亦不省識卽識
之亦復何用韓魏公稱王荊公頗識難字荊公終身以
爲恨中庸曰人之爲道而遠人不可以爲道然則人之
爲詩而遠人獨可以爲詩乎要知五味六和十二食非
不多也而工于爲易牙者不盡調也本草九千九百種
非不備也而精于爲俞附者不盡用也畫鬼魅易畫人
物難足下能思其故而有得焉則于道也進矣

答彭尺木進士書

來書教以禪學引文文山詩語云云似乎文山不遇楚黃道人便不能了生死者僕不以爲然古豪傑視死如歸不勝屈指倘必待禪悟而後能死節則佛未入中國時當無龍逢比干居士之意以爲必通禪而后能了生死耳殊不知從古來不能了生死者莫如禪夫有生有死天之道也養生送死人之道也今捨其人道之可知而求諸天道之不可知以爲生本無生死本無死又以爲生有所來死有所往此皆由于貪生畏死之一念縈結於胸而不釋夫然後蠶餅指梅故反其詞以自解此洪鑑躍冶莊子所謂不祥之金也其于生死之道了乎

否乎子路問死子曰未知生焉知死當時聖人若逆知
後之人必有借生死以惑世者故子子路之間萌芽初
發而逆折之來書云生死去來不可置之度外尤謬天
下事有不可不置之度內者德之不修學之不講是也
有不可不置之度外者死生有命富貴在天是也若以
度外之事而度內求之是卽出位之思妄之至也雖然
富而可求也雖執鞭之士吾亦爲之使佛果能出死入
生僕亦何妨援儒入墨而無如二千年來凡所謂佛者
率皆支離誕幻如捕風然視之而不見聽之而不聞禱
之而不應如來釋迦與夏畦之庸鬼同一虛無有異端
之虛名無異端之實效以故智者不爲也試思居士參

稽二十年自謂深于彼法者矣。然而知生之所由來。能
不生乎。知死之所由去。能不死乎。如僕者。自暴自棄。甘
心爲門外人矣。然而不知生之所由來。便不生乎。不知
死之所由去。便速死乎。生。死。去。來。知。之。者。與。不。知。者。無
以異也。蓋亦聽其自生自死。自去自來而已矣。易曰。乾
坤毀則無以見易。言乾坤有時而生。死也。詩曰。高岸爲
谷。深谷爲陵。言陵谷有時而來去也。生。死。去。來。天。地。不
能自主。而況于人居士寧靜寡欲。有作聖基。惜于生死
之際。未免有已之見存。致爲禪氏所誘。有所慕于彼者。
無所得于此。故也。獨不見孟子之論生死乎。曰。天壽不
貳。修身以俟之。陶潛之論生死乎。曰。浮沉大化中。不戀

亦不懼士君子縱不能學孟子亦當法淵明名教中境
本廓然奚必叛而他適昔曹操聘虞翻翻笑曰孟德欲
以盜賊餘贓汚人耶居士招我之意有類孟德故敢誦
仲翔之語以奉謝

附來札

拙詩承不鄙棄爲正其得失仰見先生接引後輩慙
惓無已之盛心敢不拜受經世出世趣各有在昔文
信公在燕獄時遇楚黃道人受世出世法始得脫然于
生死之際故其詩云誰知真患難忽遇大光明又云
莫笑道人空打坐英雄歛手卽神仙其語具集叻野
覆按也先生英雄根性所未留意者獨此一着耳生
從何來死從何去其可以人生一大事而置之度外
乎願先生之更有以教之也

再答彭尺木進士書

前書言一身之生死覆書變而爲一念之生死如被追者捕東竄西急則推墮沈洋中佛書伎倆大概爾爾所云生死者一念之積也今之微聲逐色者是也必窮極之至于無思無爲而聖人之下學上達卽在于是是尤惑之大者不可不辨夫生之所以異于死者以其有聲有色也人之所以異于木石者以其有思有爲也孔子曰非禮勿視非禮勿聽其所視所聽可知也又曰學而不思則罔見義不爲無勇其有思有爲又可知也居士必欲屏聲色絕思爲是生也而以死自居人也而以木石自待也雖然居士其果能未死而死非木石而木石

乎。夫。槁。木。死。灰。不。自。知。其。爲。槁。爲。死。也。以。其。爲。灰。爲。木。
故。也。人。則。何。能。哉。自。覺。其。爲。死。灰。便。非。死。灰。矣。自。覺。其。
爲。槁。木。便。非。槁。木。矣。而。其。似。死。非。死。求。槁。不。槁。之。心。終。
日。漂。鬱。強。制。而。不。能。自。禁。則。方。寸。中。乍。冰。乍。火。天。之。僂。
民。莫。大。于。是。周。孔。之。教。出。則。事。公。卿。入。則。事。父。兄。學。射。
御。習。絃。歌。不。一。日。放。廢。其。心。是。以。多。學。而。識。下。學。也。一。
以。貫。之。則。上。達。矣。強。恕。而。行。下。學。也。從。心。所。欲。則。上。達。
矣。下。學。上。達。未。有。捨。倫。常。日。用。而。高。談。元。妙。者。宋。儒。元。
學。佛。後。學。儒。乃。有。教。人。瞑。目。靜。坐。認。喜。怒。哀。樂。未。發。時。
氣。象。此。皆。陰。染。禪。宗。不。可。爲。典。要。居。士。道。僕。未。能。寡。欲。
未。能。立。大。體。且。綏。爲。儒。釋。之。爭。嘻。過。矣。夫。論。天。下。之。是。

非者不計其人之賢否也。孔子曰：「攻乎異端，斯害也已。」孟子曰：「能言距楊墨者，聖人之徒也。」孔孟此言，專爲中人說法，大爲之防。猶之春秋之義，亂臣賊子人人得而誅之，若必待孔子而後絕異端，必待孟子而後距楊墨，則一聖一賢孤鳴嚶嚶，無父無君之教將充，衢塞路而人無是非之心，亦不得謂之人矣。今有禁人食野葛者，或且訾之曰：「汝未啖八珍，而何禁我爲？」有笑人衣棘刺者，或且訾之曰：「汝未衣狐貉，而何笑我爲？」夫八珍非不當食，狐貉非不當衣也。而野葛之不當食，與棘刺之不當衣，更有甚于八珍狐貉之當食當衣也。則盍聽其忠言，而且緩其反擊也。且寡欲之說，亦難泥論。孔子食不

厭精膾不厭細禾膏非飲食之欲也而不得謂孔子爲
飲食之人也文王悠哉悠哉展轉反側未嘗非男女之
欲也而不得謂文王爲不養大體之人也何也人欲當
處卽是天理素其位而行如其分而止聖賢教人不過
如是若夫想西方之樂希釋梵之位居功德之名免三
塗之苦是則欲之大者較之飲食男女尤爲貪妄僕願
居士之寡之也居士又以死生之際不戀不懼諄諄相
勉所見尤非張楚金唐之逆賊也臨斬謳歌趙鼎宋之
忠臣也貶嶺南晏然出涕予之所傾齋戰疾曾子臨深
履薄懼莫甚焉前誦陶潛之語奉答者因居士偕生死
相恻喟故引而破之而非敢以爲理之至足者也鴻鵠

高飛而羅者猶視于蕞澤悲夫至于由求實在曾點之
上有論語解四篇他日寄覽

附來札

儒佛之相爭久矣儒之不能援佛而歸儒佛之不
能援儒而歸佛也則亦各行其志可也然來論所云
實有未盡鄙懷者敢復粗陳其說前所進生死之說
非謂生前死後云爾也乃謂現前一念生起之心耳
生死者一念之積也今之徵色遂聲種種不生不
滅者是一念所謂了以死之微非謂其久不生不
極現前無一念所謂了以死之微非謂其久不生不
情盡則無思無為之體可得而復也在此青聖賢所為
下學者學此而已矣所為上達者達此而已矣先生
于佛所不喜聞請言儒者之道而己矣先生欲為
基先生已能寡欲否先立乎其大者若猶未也且
奪也先生已能立乎其大者若猶未也且郭李功名
儒佛之是非而姑先究吾心之是非可也郭李功名
豈必無補于世然而君子所性不存焉不然顏氏劣
于管晏由求過于曾點矣此則文山之語又何疑

乎承示孟陶兩言誠能實而體之于生死之故亦思
過半矣雖然不以寡欲爲基而立乎其大者其遂能
夭壽不貳乎其遂能不喜不懼乎先生旣以言之惟
先生始之終之紹升不敏願執鞭以從

答洪稚存書

明吳中行劾座主江陵僕心不喜道師有過當諫諫而不聽當避位斯言也下筆後頗知其非位受之於君非受之於師不得以孟子論異姓之卿之禮援爲事師之則繼而思之位雖受之于君而所以能受之于君者未嘗非師之力飲水知源不爲無理以故仍而不收昨接手書果招足下之規夫復何辨然足下尚有未悉者書中道座主輕于舉主說良是也舉主知其人其恩重座主知其文其恩殺然唐宋以後科目盛辟舉衰士大夫舍座主無由進身則座主之恩不得不同于舉主東漢舉主有喪門生衰麻避位亦何嘗不以君臣之義行之

師弟之間若曰座主取士彼自奉功令耳于士無與也然則父母生子彼自感情欲耳亦與子無與也忘本之言伊于胡底衛庾公之斯以學射孺子之徒之故叩輪而反孟子與之夫追寇君命也學射小伎也學于其徒非學于孺子也然卒不忍以夫子之道反害夫子孟子以爲端人且引以證逢蒙之惡然則使孔孟爲人門生必不勅座主以爲名也可知唐肅邁扶王鐸上殿昭宗見之甚喜曰卿待座主如此待朕可知李夷簡勅楊憑楊遠貶其門客徐晦送之夷簡表晦爲御史曰君不負楊公肯負國乎古明君賢臣往往觀過知仁十不爽一而足下乃慮禁勅座主將有植黨之虞則尤與僕言相

背何也。僕言事師之道有過則諫諫而不聽則避位。果如僕言則門生多諫者愈多避位者愈多。大臣不善朝廷且爲之一空矣。彼座主者獨無所懾于心而不改絃易轍乎。又安見植黨滿朝而不可動搖也。所引楚棄疾李懷光事尤爲不倫。楚王將殺子南三泣其子王之心豈不欲其子之諫父耶。然而棄疾之諫與不諫傳無明文卒與父同死。或其間必有委曲難全之故。遙遙千秋難以臆斷。至于懷光謀反李璣大義滅親自無兩全之術。使當日江陵果謀反則中行劾之當也。足下書中所謂緩不及待是也。乃江陵並非謀反所劾者不過奪情一節則是江陵一身之私罪與宗社安危毫無關闕。有

何。緩。不。及。待。之。有。而。况。中。行。上。疏。之。明。日。趙。疏。入。矣。又。明。日。艾。疏。入。矣。又。明。日。沈。疏。入。矣。明。目。張。膽。攻。江。陵。者。如。雲。而。起。何。勞。門。下。士。急。急。爭。先。古。名。臣。如。漢。之。趙。主。耿。恭。唐。之。房。杜。褚。遂。良。張。九。齡。俱。有。奪。情。之。事。彼。諸。君。子。者。豈。無。門。生。故。吏。略。知。大。義。之。人。而。何。以。史。冊。寂。然。不。聞。有。彈。之。者。何。耶。史。稱。江。陵。相。萬。歷。二。十。餘。年。四。夷。賓。服。海。內。充。實。有。霍。子。孟。李。贊。皇。之。遺。風。然。則。中。行。果。有。愛。國。之。心。方。宜。留。護。江。陵。爲。賢。者。諱。過。可。矣。中。行。本。傳。稱。中。行。既。上。疏。以。削。封。白。江。陵。江。陵。大。驚。曰。已。上。耶。曰。不。上。不。敢。白。也。審。是。則。中。行。不。但。不。諫。其。師。并。欺。蔽。之。使。不。知。過。而。突。出。其。不。意。以。相。攻。擊。其。心。術。尚。可。問。

乎左氏曰人之欲善誰不如我中行好名江陵亦好名
觀其驚問疏上否頗有悔過掩覆之思使中行不廷爭
之而私執門生之義愛人以德造膝婉陳未必不動其
天良而自行求去也及聞疏已上則大名已裂狀如被
逐剛愎之性遂至倒行而逆施程子所謂吾黨激成之
禍儒行所謂賢者之過可微辨不可面數正謂此也且
中行爲他人父爲他人母忍使自已父母之遺體毀傷
廷杖尤爲可嗤而此後臺臣閣臣水火儼興互相排詆
無一日休必至國亡而後已如庸醫治病專務鬪藥爭
方而不顧其人之元氣命脈也揚其波者中行與有罪
焉僕山居老矣未必有爲座主之日而足下高才少年

爲門、生爲座、主之日、正長言之者、無私聞之者、有益故、
不覺其傾盡云。